

**Қазақстан Республикасы Парламентінің Мәжілісінде  
«Экономикалық өсім және «Нұрлы жол» инфрақұрылымды  
дамытудың 2015 – 2019 жылдарға арналған мемлекеттік  
бағдарламасын іске асыру» тақырыбында 2016 жылғы  
19 қыркүйекте өткен Үкімет сағатының нәтижелері бойынша  
ҰСЫНЫСТАР**

**Қазақстан Республикасының Үкіметі:**

1. «Нұрлы жол» инфрақұрылымды дамытудың 2015 – 2019 жылдарға арналған мемлекеттік бағдарламасын тиімді іске асыруды және Қазақстанның бірыңғай экономикалық нарығын құруды, сондай-ақ ЖІӨ-нің өсуі және жаңа жұмыс орындарын құру бойынша нысаналы индикаторларға қол жеткізуді қамтамасыз етсін.

2. Мемлекеттік бағдарламаны іске асыруға бөлінетін қаражаттың уақтылы және тиімді игерілуі үшін өңірлер басшыларының дербес жауапкершілігін бекіте отырып, жергілікті атқарушы органдардың жауапкершілігін қатаңдатсын.

3. Тұрғын үй-коммуналдық шаруашылықтың, әсіресе өңірлердің тыныс-тіршілік объектілерінің (жылумен, электрмен және сумен жабдықтау, сондай-ақ су бөлу) техникалық жай-күйін тиісінше бақылауды қамтамасыз етсін және осы мәселеде жергілікті атқарушы органдардың жауапкершілігін күшейтсін.

4. Жылу, электр және сумен жабдықтау желілерінде ресурс үнемдейтін технологияларды пайдалану және жылу, энергия, су шығынына жол бермеу жөніндегі ынталандыратын пәрменді шаралар кешенін әзірлесін және енгізсін.

5. Тұрғын үй инфрақұрылымын жобалау, салу және пайдалануға беру кезінде техникалық регламенттер мен стандарттарды сақтау бойынша жауапкершілікті күшейтсін және талаптарды қатаңдатсын.

6. ТКШ инфрақұрылымдарын жаңғырту бойынша (елді мекендерді сапалы коммуналдық қызметтермен барынша қамту мақсатында):

- іске асыру кезеңінде жобалардың қымбаттауына және оны ұзартуға жол бермейтін жылумен, сумен жабдықтау және су бөлу желілерін жаңғыртуды сапалы жобалау;

- қазақстандық өндірушілердің материалдары мен инновациялық технологияларының пайдасына басымдық беріп, энергия үнемдейтін қазіргі заманғы материалдарды, технологиялар мен жабдықтарды пайдалану талаптарына сай келетін жобалардың басымдығын қамтамасыз етсін.

7. Республиканың тұрғын үй-коммуналдық кешені инфрақұрылымының жылумен, энергиямен, сумен жабдықтау және су бөлу желілерін қамтитын интерактивтік карта-схемасын өңірлер бойынша жасау туралы мәселені қарасын.

8. Бюджет қаражатының тиімді және сапалы пайдаланылуына қоғамдық бақылауды күшейту үшін қоғамдық кеңестерді, үкіметтік емес ұйымдарды және қоғамдық ұйымдарды тұрғын үй инфрақұрылымын реконструкциялау және жөндеу барысына мониторинг жүргізуге тарту жұмысын жандандырсын.

9. «Нұрлы жол» инфрақұрылымды дамытудың 2015 – 2019 жылдарға арналған мемлекеттік бағдарламасының тұрғын үй инфрақұрылымын нығайту жөніндегі бағыты шеңберінде жылжымайтын мүлік объектілерін қаржыландыруды, салуды және өткізуді басқару жөніндегі функцияларды орындайтын бірыңғай ұлттық операторды айқындасын және нәтижелерге қол жеткізу бойынша бірінші басшыға жеке-дара жауапкершілік жүктелсін.

10. 2017 жылғы 1 қаңтарға дейін «Нұрлы жол» инфрақұрылымды дамытудың мемлекеттік бағдарламасын іске асырудың аралық кезеңіне баға берсін және Мемлекеттік бағдарлама шеңберінде бөлінген қаражаттың экономикалық әсеріне талдау жүргізсін.

11. «Бизнестің жол картасы - 2020» бағдарламасының іске асырылу тиімділігін зерделесін, көтерме-бөлшек сауданы, жылжымайтын мүлікпен жасалатын операцияларды, қонақүй бизнесін, демалыс пен ойын-сауықты, сондай-ақ бюджетке салық төлемейтін және жұмыс орындарын ашпайтын кәсіпкерлік субъектілерін субсидиялауды тоқтатсын.

12. Мемлекеттік-жекешелік әріптестік қағидаттарын белсенді қолдану және жеке капиталдың «Нұрлы жол» инфрақұрылымды дамытудың мемлекеттік бағдарламасын іске асыруға қатысуын күшейту үшін квазимемлекеттік сектор субъектілерінің жинақталған әлеуеті мен қаражатын пайдалансын.

13. Халықты «Нұрлы жол – қазақстандықтардың әл-ауқатын арттырудың жарқын жолы» атты бірыңғай логотиппен бұқаралық ақпарат құралдары арқылы Мемлекеттік бағдарламаны іске асыру кезеңдері туралы хабардар етсін, сондай-ақ тұрғын үй бөлу тәртібі мен рәсімдерін, кәсіпкерлікті қолдау тетіктерін жария етсін және уәкілетті органдардың ресми сайттарындағы ақпаратты үнемі жаңартып отырсын.

14. Мемлекеттік бағдарлама шеңберінде халықты тұрғын үй құрылысын іске асыру тетіктері туралы және оның құралдары туралы хабардар ету жөнінде белсенді жұмыс жүргізісін.

15. Бизнесті дамыту үшін рұқсат беру рәсімдерін оңайлату және әкімшілік кедергілерді азайту мақсатында реттеу және бақылау функцияларының нәтижелері бойынша мемлекеттік органдардың қызметіне жан-жақты талдау жүргізісін.

16. Жаңа реттеу құралдарын енгізу және олардың қолданыстағыларын қатаңдату, сондай-ақ қолданыстағы реттеуіш құралдарды қайта қарау жөніндегі реттеушілік әсердің салалық министрліктер әзірлеген талдауына тұрақты мониторингті жүзеге асырсын.

17. Әкімшілік кедергілерді азайту және бизнес-ахуалды жақсарту бойынша мемлекеттік органдардың рейтингін енгізісін, сондай-ақ рейтинг нәтижелерін бұқаралық ақпарат құралдарында жария етсін.

18. Бәсекеге қабілетті отандық өнім шығару мақсатында өндірістік қызметте жұмыс істейтін кәсіпкерлік субъектілері үшін мемлекеттік қолдау шараларын пайдалансын.

19. Қаржы лизингінің кредиттері мен шарттары бойынша сыйақы мөлшерлемесін субсидиялау шеңберінде ұлттық теміржол машина жасау кәсіпорындарының сатып алуы үшін өткізілетін өнімдердің тізбесін кеңейту мүмкіндігін қарасын.

20. ЕАЭО мен ДСҰ шеңберінде Қазақстан Республикасы үшін преференциялар алу мақсатында ұзақ мерзімді жасалған келісімшарттардың қолданылу мерзімі аяқталғанға және жергілікті ету көлемінің нормалары қолданысқа енгізілгенге дейін АЭА-дағы қолданыстағы жеңілдіктер мерзімінің ұзартылуын қамтамасыз етсін.

21. Импорттық өнімге қатысты бағадағы қазіргі теңсіздікті жоюға мүмкіндік беретін қазақстандық машина жасау өнімдерінің бәсекеге қабілеттілігін қамтамасыз ету мақсатында «еркін қойма» режимінің қолданысын ұзарту бойынша шаралар кешенін әзірлесін және енгізсін.

22. Жұмыс күші тапшы өңірлерге еңбекке қабілетті халықтың ішкі көші-қонын ынталандыру үшін жаңа тұрғылықты жерде жеңілдікпен тұрғын үй, жер учаскелерін, жұмыс орындарын ұсыну арқылы қоныс аударатын азаматтар үшін жағдай жасауды қамтамасыз етсін.

23. Халықты сапалы ауыз сумен қамтамасыз ету мақсатында республика өңірлерінің ауылдық елді мекендерін сумен жабдықтау объектілерін салуды қаржыландыру мүмкіндігін іздестірсін.